

Pitaahomi Utipiho Jiho

Kimandi Pitaahomi Utipihandi Jihandapi Nesipihande

Jisaasihomi otipipatihyaami wo komi ambipati Pitaaho kimo utipimo jipatipiyahore kinaungwiha 65 A. D. hura. Ko kimandi utipimandaatihapi sandaase, “nini Baapironihanda koninihi bindataati kimo utipimo jipatipiyataayo,” daase. Nyahi nahatiyaani windi monihoni ko akiti kandaatindiho e Romihandapi piwiha siwipati nepemaahiwati Baapironihando tati katindiho. Pitaaho mmonati gwinyaataati Jisaasihomi tiworisa taawi naanjihaiwa kaiwi ami Kiraisihomi isihiyai taawi naanjihaiwa nunyauhi kiya taawi ambipati yaawihaiwa nehauhi kandapi Pitaaho kimandi utipimandi jipatipiyahande. Ko kiyaaisi kaundataase kiyaaisi naanjihaiwa wiwa nusoaipahonihura kiya andititiwi Jisaasihoai ahosumwapi namaamapi anititwi Koai isipi kiyaanini bitoaitaatiwo.

1 Pitaahomi Utipiho Napimasataise

Pitaaho isihiyai ipihirete gaahure undisiha (1:1-2)

Autaahaatiho nyangisi anditinyaiwataati ipotihura Komi asiyaanimataati bimitihaahandi nanyamitandi aimi katise. Isi nyahi kandi naito. Isi ami nyahi yawanaani andititaati bitoaitihaawo tisiha (1:3–2:10)

Nyahi noaipawaati Autaahaatihomihyaanimataati Awaisiho japihi napitandihandapi jatihawo gaahaiwaahihini kiyaaninihi kaimi nutihaawo tati kanyatisiha (2:11–5:9)

Pitaaho gaahati kiyai kawisati komi piwiha osasepihaasiha (5:10-14)

Nyahi Autaahaatihomi Isihyaanini Akiyihyaanimatihayoni Ami Gaahapaahihini Kiyati Gaahaiwa Naitihaawi Maaritaati Gwinyaahohiwaiwa Naitihaawi Jatitihawo

1 ¹Nini Pitaahonine. Ningisi Jisasi Kiraisiho komi piwiha gaaha awusaati isihiyai kaunditandi nanimahanati natanoaasisihonine. Sahi Autaahaatihomi isihyaati Autaahaatiho sapi aimi nisihyaare tati nasamahainjawihyaati sahi toriwatiwi kahapihini kahapihini nehi gohaparihyaati wani yapihaiwa isihiya usaamihaiwa Pondusihandaahuni

Garesiyaahandaahuni Kapatosiyaahandaahuni, ami Esiyaahandaahuni ami yapipati Bitiniyaahandaahuni bimohiyihyaatapi nini utipihō kimo jpatipaindi nusoasataayo. Isihyaati sahi Autaahaatihopi giwunyaahohiyihyaatami aunahipati akipati yamihapataatihe. ² Jihī aimehura Autaahaatiho kahapaamapipa sangi kiyati ahaisura isihya siya nisihyaimatitaatiwe, tati katati aimi gwinyaataise. Siyati gwinyaataati sangi nisihyaate, satati nasamahainjihī sahi noaipapi ipotihura titihī komihyaatimatawaayopo. Jihī aimehura Apiho Autaahaatiho sapi, satati isihya siya noaipapi titihī nisihyaimatitaatiwihīye, tati sangi nasamahainjawihyaatangi sahi nisihyaate tati nasamihanataise. Siyati ko sangi nasamihainjihī ami Komi Itipihō Gaaho sangi neti nasepemaishaasihī ami sahi noaipapi nehī Autaahaatiho sawahomihyaatimatitaatiwo. Iyati Itipihō siko sangi neti Autaahaatihomi ndiheti titihī gaahyaati popitihyaatesamataise, ami Sahi Jisasi Kiraisihomi piwiha atiwiwi winjapepihirisaihi komi jitipati nyapi napotaati nuhaasipati sami maipihaiwa basati nesamahoni sahi noaipapi Autaahaatihomi ndiheti titihī gaahyaati popitihyaatimatitaatiwo.

Aihī ami nini sapi Autaahaatihoai piwaunditi nunjeniti gaapisundataayo, ami sangi ko maariho nasanyati gaahandi kasisati, ami sami maariho omanjititihī neti yatihisiwati japatisa napaisaatisamahonihī, ami sahi waati nga awaindihandi maariwiwī bimitaatiwo.

Asiyihyaanimatitihāhandi Gaahandi Akitihandi Yamihapataatihi Nyapi Nyainjatati Ahinyondaise

³ Nyahi Autaahaatiho nyami Awaisiho nyangi nyainjatisiho Jisasi Kiraisihomi Sapiho, ami kimiko komi Autaahaatihoai mepi autaaahewaumaitihaawo. Ko nyapi maariho asipiyataati, ami kandaahi Jisasi Kiraisihoai animwaahipatombi japihi ahowimataise. Iyati ko nyapi apipaahi aungwohandi maariho tundati asipinyindahandaahuni, ami Jisasi Kiraisihoai napwihi asohoemati japihi ahowimasitihandaahuni nyangi neti wanihyaanenyamati asitimatitihāhandi nanyinyataise. Iyataati ami sandi Autaahaatiho neti wanihyaanini asiyihyaanenyamasitindaahi neti anditinyaisihī andititaati Autaahaatiho gaahapa nanyamitandi katimbipa nanyinyonihī naitihaawi jatimi nohaayo. ⁴ Iyataati ami nyahi Autaahaatiho nyangi gaahapa kanyisati nanyamitandihapa ko ahinyisati bimimbipaapi taawa jatimi nohaayo. Iyataati sapa gaahapa nyapi ko yamihapataatihi ahinyihī kapihi ahinyondaise. Ami kapa windi neti nopisasinati namaamasaatati nga ahinyondaise. Isi Nyahi yamihapataatihi niyahaahura asitimatitihāhandi newaati nasisoaari Autaahaatihoaisaati bimito.

⁵Sahi Kiraisihopi giwunyaahauhi, ami Autaahaatiho watipihosi komi watipihanda sangi biyati anitisati jainjatataise, ami sahi nga bimaami nuwi asisiha ipotiheti Autaahaatiho apipaahi gaahaiwa sapi ahisiwaiwa naitaatiwihura noaipahonihi kaiwa sahi naitaatiwo. Sahi saiwa nesaihi ami sangisuni kahapaamapipa nahataapai Autaahaatiho japihi neti itatamanati titihemaitando. Isi saiwa Autaahaatiho katiwaiwa Jisaasiho japihi nasonihura ko neti akiwaiwemaitaise.

⁶Iyataati Autaahaatiho saiwa gaahaiwa sangi nasanyati kasitandi katiwimaiwaapi sahi waati maaritiwise, ami nehi masihonjapi sangi wiwa sami ambipati maariho yaasihaiwa nasisenati wani taati nasoaipataise. Isi gaasi kaiwa kiyati sangi nasoaipane. ⁷Iyataati saiwa sangi siyati yaasihaiwa nasoipasirihiretapi Autaahaatiho sahi Kiraisihopi giwunyaahohitihandi apipaahi akiti akitihando, e nehi otaatapi jaiwaiwihando, tati neti mmondande. Iyataati gorihandapi sahi gwinyaapise. Kandi apipaahi gaahanditihisihiya kandapi maaritiwihande. Saiwihandi isihiya nepi isiwatawa wiwa gorihandaatihi wapa ikwaatipihohi maipihapa ahotiso ahimotiso, tiwi mmondaatiwi sisiha apipaahi waati noatitihahaapihi gorihandi tihawaayopo kapa ikwaatipihohi tihati sanoti owetanihi nehi titihisi gorihandihititando. Iyataati ami gorihandihisi gaahandindaahandi kandi neti nopisasinati owetitandihande. Ami sahi Kiraisihopi giwunyaahohitihandihisi gorihandi nusatipihaaati apipaahi gaahande. Isi ami isihiya gorihandi nehi akitihandihisi e wapa ikwaatipihohisahando, tiwi mmondaatiwi tihohipatamatiyati sahi Kiraisihopi akiti akitihisi giwunyaawaayowo e owetiso, tati Autaahaatiho jasondandi saiwa sami ambipati maariho yaasihaiwa kihira kihiraapi sangi nasoaipataise. Iyonihi sahi kaiwaapi yaiwi windi timaamihaitaatiwo. Saiwi windi timaamahiyawi watipitihisi bitosaihi, Jisasi Kiraisihohi japihi auta nasataahura sangi jasonataati watipitihisi giwunyaapi binyaihi sapi ko waati awaindahandi maarititaise. Maarititi sangi sahi gaahiyaate satati sangi Jisaasiho neti mepi autaaahesamaitaise. ⁸Akite. Sahi Jisaasihoapi apipaahi windi mausonawaahandi kandi koai maariho taawi nunyawaayopo. Aiwi ami wanisangi sahi koai windi mausonawaahandi kandi kopi anditihisi giwunyaapi ami waati aungwohandi kopi maaritawaayopo. Iyataati sandi nyahi sisaati aunihisi maaritohitimandi kimaapi yapipatambihapa wapaapi maaritohitihandi apipaahi aungwohandi nusatipihahaahande. Isi sandi nyami omanjitihapi maaritohitindapi siyahande taati nyahi windi maahomwaanapi ausaawa kamaatito. ⁹Ami sandi sahi aungwohandi maaritotimandi apaapimahe, ami sahi Kiraisihopi giwunyaahauhi ami kandaahi sangi Autaahaatiho taati japihi nasamaasihe.

¹⁰Jihura piropetihisi wani kimura Autaahaatiho taati sangi gaahandi kasisati japihi nasamaasitimandapihi piwiha ausaawaayopo. Ausaapi

kiya kandapi baiwi mwitipisawi daawaayopo Autaahaatiho isihiyai japihi numwaitandi katindihandi Autaahaatiho kiyonihi noaipahonihi mmondo tiwo. ¹¹ Iyataati kandi maahiwura, ami ninapitiyati noaipati ami utaaso ko diyaamahotati, ami ko maahiwura noaipaitaindiho, tiwi kiya mmondaatiwi pihitiwi mwitipisawi daawaayopo. Iyataati sura isihiya siya Autaahaatihomi piwiha atiwi nepi ausaahohiyihyaamiheti Itipiho Gaaho ahondaati ko kiyai satati neti giwunyaataise. Ipotihura Kiraisiho noaipahonihi komi ambipati maariho yaawihaiwa kahatamatipetahaiwa isihiya koai kawiji numwisaihi nepi noti, ami kaiwetapi koai Autaahaatiho ambipati awaipati numwitandihatapi kiyai neti giwunyaasihi, ami kiya kaiwaapi piwiha ausaapi katawaatopo. Aiwi kiya satiwi, saiwa maahiwura ausaimaninati noaipaitaindiho. Iyati ami saiwa maahiwura ninapitiyati noaipaitaindiho. Iyati ami utaaho diyaamahotati ami taati ninapitimatoniho ko noaipaitaindiho, tiwi kiya waati pihitiwi gwinyapenawaayopo. ¹² Saiwi kiya taawi gwinyaahauhi Autaahaatihomi Itipiho neti kiyai siyati giwunyaati nunjataise. Saiwa kiya taawi ausaapi katimi nyohiwiwa sura kiya bimaami nyohura windi kaiwa namoaipahonihi ami kiya sawana wapa noaipahonihi gaahapa nepi windi maatatamanindaapo, undato. Iyati isihiya ipotihura noaipahohiyihyaamihatihi saiwa kiya Autaahaatihomi piwiha atiwi nepi ausaahohiyihya katohiwiwa noaipahonihi gaahandi naitaapo, undati nunjataise. Aihi ami kiya namapi Autaahaatiho sangi nasamaitandi wani taati kaiwimaiwaapi piwiha ausaawaayopo. Iyataati piwiha waniha gaaha Kiraisihopitaha ausaahohiyihya jihi piropetihya katohiha ka kasatauhi sahi aimi atisawaayopo. Iyataati Autaahaatiho Itipihoi yamihapataatihapi natausaasihi isihiya piwiha waniha gaaha Kiraisihopiha ausaahohiyihyai anditiwisihi Itipihomi watipihanda kiya piwiha kasatawaatopo. Iyauhi ami Autaahaatihomi otipipatihya yamihapataatihapihiyaisangi kimaiwa Autaahaatiho sahi isihyaatangi kasiwiwaapi mmondaatiwi kiya waati maarihiwimawaayopo.

**Autaahaatiho Nyangi Gaatati Nanyamaataise Nyahi Ko Nehi
Sawahopaahiyaati Nehi Sawahomihyaanimatitihaaowo**

¹³ Isi ami sami amitiha gwinyaahohitihanda wapa kaitaatiwi nepi timaniniwi timetiwise. Aiwi sahi sami piwiha dahopa baiwi jatiniwise. Aiwi Jisasi Kiraisiho auta nasonihura Autaahaatiho sangi japihi nasamaati gaahandi kasitandihandapi andititijiwiji jimimi nuwise. ¹⁴ Sahi metihonya piwiha atiwi asimwaatitihimi piniyohonyonyaamataiwi Autaahaatihoai atiwiwi komi otitihimi pinuwi kopi maariwiwi koai winjapepihiriwise, ami aimi komi manyinyaatiso. Aiwi sahi jihura Jisasi Kiraisihopi piwiha waniha gaaha sangi atiwi nepihura, maipihaiwa kihaiwa kihaiwa sami maariho ambipati jandoti

maaritiwaiwa kiyohiwaiwa japihi windi kamaiwise. Owetane. Kaiwa namapi nanipimatiwimapise. ¹⁵Ami Autaahaatiho sapi gaatihi nasauhi japihi nasamaasiho apipaahi gaaho ainahiho, ami maipihandi windi namumatati koai wapihi yandihoho isihiyai nehi gaahandihohi kawisahosi, ami sahi komihati nepise. Nepi Autaahaatiho maipihapaapi koai yandihematati kapaapi apousati poundihohi kapaapi manditipaipatamataiwi, sahi yatihematiwi titihi ainahiyihyaati gaahyaati noaipapi nehi ko sawaho Autaahaatihohaisaahihi nunyaniwi nehi ko maaritatu titihi kairihireti kaiwise. ¹⁶Iyataati ami Autaahaatihomi piwiha utipihandi jihandaatihi ahotisiha satatu katise:

“Nini Autaahaatihonini apipaahi titihi gaahonini popitihoninisi, ami sahi nisi isihyaati naasikatu kaiwi titihi gaahyaati popitihyaati nisihohoani napiwi bimaawise,” tati ahondaise.

Pirisihiya 11:45, 19:2, 20:7

**Jisaasihomi Jitipati Nawiho Apipaahi Awaisihomatiyahataahi
Autaahaatiho Nyangi Japihi Nanyamaataise**

¹⁷Iyataati sahi Autaahaatihopi gaapundawaahura, “Apore,” tawaatopo. So Apo utaaho woai usonataati siyaho setahoso, tati tipitapaati usonaahomaahae. Owetise. Nehi nyahi ninaasiyaanami kiyohirihireti mmonatu kireti ninaasiyaanangi tipitapaati nyasonahore. Isi sahi wani kimaapi yapimbataapihi bindawaawi kimbihohi nyami aunahipati apipaahata bimitihaahata bindahaayo, tiwi windi sahi gimunyaapise. Owe. Nyami aunahipati apipaahatu mihaatu yamihapataatihi ahondaise. Isi sahi yatihohi ipatisaniwi baiwi itatamaniwi Autaahaatihopi gwinyaapi koai nepi autaahi isiwatu, ami nasisoaari komi maaritirihireti japepihirihohiwise. ¹⁸Sahi aimi gwinyaapihiyaate, sahi jihura bimohirihiretapo. Sami jaasoyaami maipihaiwa kiyohiwaiwa sangi nasanyauhi sahi kaiwa mmoniwi nepi kaiwaatihi napwitiwi apipaahi tanyaaha akipipa owehandihohi bimotohandapo. Saiwi sahi jihura maipihaiwaatihi bimauhi kaiwaatihapi Autaahaatiho wapa sapi nunyatu nuwatu nasamaatu nehahaatesamasihohi? Iyataati Autaahaatihohi wapa maapi gaahapa keti kuraanihi namasaatatu owetimbipa nawiho siriwaaho, ami gorihanda nunyatu sangi japihi nasamaataamaise. Owetise. ¹⁹Kiraisihomi jitipati apipaahi gaahatu nawihome ambipati apipaahi owehatu nuhoaamasitihandaahi Autaahaatiho sangi japihi nasamaataise. Ko Kiraisihomi jitipati sipisipihohi sipipihohi isihyaami maipihaiwaapi tipihohi Autaahaatihoai dipumaniwi waamaindumapi nunyohipatamatiyati komi jitipati nuhoaamataise. Iyataati Judaahiyaami winihapipa ahotirihireti, sipisipihohi sipipihohi gohiho asaaha timbipa oweho apipaahi gaaho tipihohi isihyaami maipihaiwaapi Autaahaatihoai dipumanihohihomatiyati Kiraisihohi napotaise. ²⁰Iyataati jihohi aimehura yapipati Autaahaatiho sangi kiyatu ahaisura Kiraisihohi siyatu, isihiyai japihi numwaitandihatu nasatu

otipipati kiyati napwitaise, tati aimi katati namihanati Ahiwihihore. Aihi ipotinihi wani kimura asisiha kimaiwa ipotimaiweti Autaahaatiho Kiraisihoai natausaasihi nasati kimaapi isihiyaami ndiheti napotaise, sangi anditisaiwati japihi nasamaitando. ²¹ Ko Kiraisiho sangi japihi nasamaati anditisaisihi ami sahi Autaahaatihopi giwunyaawaayopo. Kiraisiho napwihi ko Autaahaatiho ahowimati japihi numwaati koai neti nuwimaati ambipati awaipati nunyati neti awaisihoemataise. Isi sahi sandapi gwinyaapi Autaahaatihopi giwunyaapise. Aiwi ami ko sangi nasamaati gaahandi kasisati nasamitaisi, ami akiti nanyamitaise, tiwi sahi kopi giwunyaahohitihandi anditisaihonihi komiheti ndiha ahiyawu jatimi nuwise.

**Jisaasihopi Giwunyaahohiyihyaanini Komi Naisihyai
Maariho Napaitaati Numwitahaawo**

²² Sahi Kiraisihomi piwiha atiwiwi japepihirotihandaahi sahi noaipapi Autaahaatihomi ndiheti aimi titihi gaahiyaati apipaahi popitihyaate. Popitihyaatitawaawi ami sami isihiya naisihya Autaahaatihomi isihiya Kiraisihopi giwunyaahohiyihyai sahi napaitiwi maariho nunyawaayopo. Isi sahi wani kimura andititiwi Kiraisihomi isihiya kopi giwunyaahohiyihyai sami maariho akitinihi nunyawise. ²³ Osaataati nandapaami yandipihoni wanihapa ningoti nandawisa noaipasipatamatiyati, Autaahaatiho windi namaapoti konihi asohoematati bimisiho sangi neti wanihiyaatesamasihoni sahi wanihiyaati noaipapihyaate. Iyataati ami sahi nandapaami yandipihoni kwitaaho yapipatambiho keti owetitandihonetapi noaipapihyaatimaahae. Owetise. Nandapaami yandipihoni Autaahaatiho kaisiho nasisoari ahotitandihonetapi sahi noaipapihyaate. Nandapaami yandipihoni so Autaahaatihomi Piwihaare. Sa piwa owemeta kaanihi ahonda isihiyai asiyihyaimatitawihandi taati nunyahaare. Isi sa piwa kaaraahi sangi neti wanihiyaatesamati nasamoyaati asitimatitawihandi nasanyataise. ²⁴ Sa piwiha apipaahi akitihaare. Iyataati ami Autaahaatihomi piwiha jipatipindisihaatihapi satati kandaase:

“Isihiya nahatiya woyiha tandipihoni kitarihiramataiwihye. Iyataati ami kiyaami uti apotinihopipa tandipihoni kwitaahomatiyahape. Iyataati woyiha kitarihiri awaipitihoni ami kwitaaho tiwihandiwataise. ²⁵ Sapaahi siyataahandi kandi Awaisihomi piwihaahi kaanihi nasisoari ahotimi notaise,” *Aisaiyaho 40:6-8*

tati katise. Sa piwa isihiya piwiha gaaha sangi ausaapi aimi kasatauhi sahi aimi atisotihapisato.

**Awaisiho Nawiha Apipaahi Watipihoni Kaanihi
Ahotisihaamatiyati Konihoni Nasisoari Bindataise**

2 ¹ Ami sahi wani Kiraisihomihandaahi aimi noaipapi wanihiyaati gaahiyaatimatawaayopo. Isi ami sahi maipihaiwa

kahatamatipetahapa nahataapa namamapise. Aiwi ami jaipipa namapise. Aiwi ami isihiya nyapi gaahiye nyatitotiwi jaiwaiwihaiwa nehi yamaati tiwatihaati ambipati, ami maahomwaanapi katiwi kiyohiwaiwa bipi namapise. Aiwi ami isihiya usa wapa kahapaamapipa asaketahiyaapi sami maariho ami mandiha yaasati nehihaiwa aposiwaiwa saiwa namapise. Aiwi ami isihiya usaapi maipihaiwa gwinyaapi katiwi kiyaametirihiretapi setahiye, tiwi kiyaami ambipati nausohaapi ahoaapi kamaatiwise. Saiwa nahatewa kamaiwi bipi namapise. ²Iyataati nyahi aimi ginyunyaatahiyaane, metihonya gwisahaatapihonya amwitihiri nandaatiwi apipaahi maaritimihauho. Isi Autaahaatihomi piwiha sa amwitihiramatiyahaasi sahi atiwi nepi metihonya gwisahaatihapihonya saniyaami amwitihiri nanihohipatamataiwi ka sahi nepi amwitihiramataiwi nasisoaari naniwise. Iyataati ami sa piwa amwitihiri gaahiramatiyati maipihapa katihi wapa ahimotati apipaahi gaahaare. Isi sa piwiha amwitihiramatiyahaasi sahi atiwi nepi amwitihiramataiwi maaritiwi nainjaihi ka piwa sami maarihoai neti nga anditiwiwati watipurimati, ami sami gwinyaahotihandi neti watipisamahonihi, ami sahi noaipapi watipihyaatimatitaatiwo, metihonya amwitihiri waati nanawaawi kiraahi gwinyaniwi noaipapi watipitopatamatetitaatiwo. Sahi saiwi kaisaihi ami Autaahaatiho sangi japihi nasamaahonihi ami sahi koaisawi maasi bimitaatiwo. ³Autaahaatiho sangi gaahati kasihi aimi mmoniwi gwinyawaawi Awaisiho Autaahaatiho ko gaahoe tiwi gwinyaawaayopo.

⁴Autaahaatiho Jisaasihomihetapi otipipati apipaahi awaipati kiyataise. Aihiko Jisaasiho yasiha mihotirihiri asirihiri apipaahi watipihiri nawiha watipihamatyahore. Ko siyahotihihandi kandi isihiya yapipatambihya moniwatawa mihotirihiri kimiri gaahirimahe maipihire, tiwi nemapi ahosumwawaayopo. Kiyaahi siyauhihandi kandi Autaahaatiho Kopi utahoe gaahosi yasiha anaahiha anaanj anitisati mwindiwati isiwatati otipipati nawihiyati nga kaitaiso, tati Autaahaatiho Kiraisihoai namihanati ahiwisataise, otipipati sati kaitando. ⁵Iyataati ami sangisangi mihotirihiri asirihiri watipihiri gaahiri nawiha apipaahi kai watipihamatiaiwihyaate. Aihiko ami Itipihoe Gaahomi watipihandaahi sahi Autaahaatiho nasati bimitandi anjanamataiwihyaati noaipaitaatiwi animatataise, sahi noaipapi titihi Autaahaatiho sawahoe komihyaatimatitaatiwo. Saiwi komihyaatimatisaihi komi Itipihoe Gaahoe samiheti nasati bimitando, jihura Isiraherihya Autaahaatihomi anjanj animatauhi Autaahaatiho sawahoe nasati kandaatihiko nandaati katihi bimipatamatiyato. Autaahaatiho siyati kasindimandi sahi noaipapi titihi komihyaatimatiwi kopi mmoniwi gaapundiwi koai mepi autaahepumaitaatiwe. Sahi saiwi kaisaihi ami Jisaasiho sahi saiwi gaahaiwa wapa kiyohiwaiwa netati Autaahaatihoai

waamaindumwahaiwa numwitaise. Nyami gaapunda Autaahaathihoai mepi autaahemwahohiwaiwa Jisaasiho nyapi kaindihandapi Autaahaathiho gwinyapenataati maaritati naitaise.

⁶Iyataati sa piwa akitihaare Autaahaatihomi piwiha jihaathi ami satati ahondaiso. Piwa saapi Aisaiyaaho sata kandaase:

“Sahi baiwi atiwise. Nini utaahe woai aimi namahandi ami nini wani koai aunahipati Saiyonihanda ahiwisataayo, ko awaisiho jihoematati nisi isihiyai winjaati bimitando. Nini koai ahiwisataayo nisi otipipati kanitando. Nini kopi maarititihore. So Awaiso ipati mihotirihiri watipihiramatyahore, ajaangi mwindiwuwati anitisati isiwatitendo. Sandi apaapimaato. Ami Autaahaatihomi isihiya komiheti ahotawa komi watipihandi numwihi kiya komi watipihandi newaayopo. Isi isihiya kopi giwunyaahohiyihiya mawihaiwa nepi windi namosasindaapo. Owetitaise. Kiya nehi maarititaapo, ami kiya kopi nehihandi giwunyaawaamaayowo,” tati katise. *Aisaiyaaho 28:16*

⁷Isi ami sapaahi Kiraisiho noaipati yasiha anaahiha mihotirihiramatyahore, komiheti sahi kopi giwunyaahohitihanduni jatohitihanduni nausawi ahaitaatiwo. Iyataati ami sandi apaapimaahae. Kiraisihoai namihanati aimi ahiwihi ko noaipati nahataapaami Awaisiho Jihoematataise. Iyataati ami Autaahaatihomi piwiha jiha aimihaatihapi isihiya kopi windi gimaawunyaapihiyaapi ami Kiraisihoai ahosumwahohiyihiyaapi satati katati jipatipindise.

“Otikipatihiya ajaangi animatohiyihiya yasiha kima gaahaamaahe maipihe, tiwi nemahotiha ka wani noaipati mihotirisati apipaahi watipihandaise anangi neti nga mwindiwuwati anitisati isiwatitendo,” tati jipatipinda ahondaise. *Aunihihiri 18:22*

⁸Iyataati ami isihiya Kiraisihopi windi gimaawunyaahohiyihiyai Autaahaathiho wihoaanjhandi yaawihandi nunyati neti nusosasaki aunahipati maipihati yaawihandi naitaatiwihataahemaitaise. Iyataati ami sandapaahi Autaahaatihomi piwiha wapihi jipatipindisihatihapi Autaahaathiho Aisaiyaahomihetapi satati kandaase.

“Ko nawiha gwiharaaha mwitihamatyahore isihiyai auhiraapihi muwitando. Iyataati ami ko nawiha awaisihaamatyahore ketapi napepaatiwi timihaitaatiwo,” tati katise. *Aisaiyaaho 8:14*

Isihiya Kiraisihomi piwiha Gaaha nemapi ahosumwahohiyihiya siyai nawihaaraahamatiyati muhonihi timahiyawi kiyaanihi nosasindaapo. Saiwi kaitaapo tati Autaahaathiho jihura aimi katisihaare.

⁹Iyataati ami sangisaahi Autaahaathiho, sahi aimi nisihiyaate satati nasamahanahiyaate, sahi noaipapi titihi komihiyaatimatitaatiwo. Sahi Awaisiho Jiho Jisaasihopi gaapundiwi koai mepi autaahepumawaayopo. Sahi titihi gaahiyaati ainahiyihiyaati bindawaawi

Autaaahaatihomihaiwaapaahihi nasisoaari gwinyaapi kiyohiyihyaati siyaati akitinihi titihi Autaaahaatihomihyaate. Sangi Autaaahaatiho sahi nisihiyaate, satati nasamahainjawihyaati titihi komihyaati bindawa isihiyai Autaaahaatiho gaahaiwa kasiwaiwaapi ausaapi Autaaahaatiho sanyisahoe, undiwi kaunditaatiwe. Aiwi ami Autaaahaatiho maipihandi asahatindihandi bimohitihandaatihi namasi nausainjitihandi apipaahi gaahandetapi napiwise, tati gaata nasamaasitihandapi ausaapi isihiyai kaunditaatiwe. ¹⁰Iyataati jihura Autaaahaatiho sangi sangi nasamaasura sahi Autaaahaatihomihyaatimaahae, owe sangi nehi wiyaatimatiwi bimambiwihyaate. Saiwi sangi wiyaatimatiwi bimambiwihyaatisi wani noaipapi sahi Autaaahaatihomihyaatimatawaayopo. Iyataati ami jihura Autaaahaatiho sangi gaahandi windi kamaasise. O ami wanihi Autaaahaatiho maariho sapi asipiyati sangi gaahati kasisati jatatananati anditisaiwataise.

**Nyahi Autaaahaatihomi Otipipatihyaanisi Komi
Otipipatihyaamihireti Bimitihaawo**

¹¹Nisi naisihyaati nini sangi maariho nasanyohiyihyaati nisataiwi Kiraisihopi giwunyaahohiyihyaate, kimaapi yapimbataapihi bimohipimbihii apipaahapihi sahi bindawaamaayopo. Owetise. Nehi gohihapihi isihya yapipati witaahapihiyaatamataiwi bindawaayopo. O ami aunahipati apipaahatihi yamihapataatihi Autaaahaatihoapihi ahondaise. Aihii ami nini watipindi sangi sandi kasatataato. Sami ambipatami maaritwaiwa windi kamaiwi kaiwai nepi daahi ipihatiwise. Saiwa sami maarihoai taati tiwuwaiwaapito. ¹²Isihya Autaaahaatihopi windi gimaawunyaapihiyaami otihatihii sahi Kopi mmoniwi gisunyaatati nasesipainjihii kopi giwunyaahohiyihyaati titihi gaahaiwaahihi kaiwi daiwi bitopi bimaawise. Sahi saiwi gaahaiwaahihi kaisaihi ami kiya Autaaahaatihopi gimaawunyaapihiya sapi satiwi, kimiya isihya maipihaiwa kaiwihiye tiwi katiwi kaimbiwihya kiya ami sahi gaahaiwaahihi kaimi naisaihi ipotihura sami gaahaiwa kiyohiwaiwa mmondaapo. mmonawaawi kiya satitaapo. E kimiya isihya Autaaahaatihopi giwunyaahohiyimiya gaahaiwa kiyauhiihandi nyahi yawanaanini maipihaiwa kiyahaayo tiwi gwinyaitaatiwo. Saiwi gwinyaawaawi asisiha Autaaahaatiho isihiyai neti tipitapaati usondandi nasonihura sahi gaahaiwa kiyohiwaiwaapi kiya namapi Autaaahaatihoai kinyi gaahone gaare, undiwi nepi mepi autaahepumaitaatiwo.

¹³Iyataati ami Awaisiho gwinyaati maaritirihiretapi gwinyaawaawi winihapipa nahataapa isihya yapipatambihyaami ahiyohipipa baiwi sahi mmoniwi japepihiriwise. Iyataati ami awaisiho jihoematati (Romihanda bindataati) isihiyai nahataapihi winjaati bimisihomi piwiha katonihai baiwi atiwi japepihiriwise. ¹⁴Aiwi ami yatihii

Piropinjihandami gapimaniho awaisihomi piwiha winihapipa baiwi japepihiriwise. Sandi apaapimaasato, ami isihya siya awaisawihya awaisiho jiho (Romihanda bimisiho) namihana ahiwihihyeye isihya maipihaiwa kiyohiyihyai maipihaiwa saiwa kamaiwise, undati yawimatuni ami neti napuwatuni, ami isihya piwiha winihapipa atiwiji gaahaiwaahihi kiyohiyihyai gaahiyaate, undati kiyai mepi autaaahemwaitanduni namihanati ahiwihihyaare. ¹⁵Sahi saiwi titihi gaahaiwaahihi kaitaatiwi Autaahaatiho maaritataisi gaahaiwaahihi kaiwise. Sahi saiwi gaahaiwaahihi kaisaihi isihya Autaahaatihopi gimaawunyaatati ami komi piwiha minjapepihiriwi, ami piwiha gaaheti sahi japepihirauhi piwiha maipihaiwa kasatohiyihya mmonawaawi mawonihhi namapi bipi ipatisaniwi kiyaami piwiha bipi namihaitaatiwo. ¹⁶Sangi Autaahaatiho aimi japihi nasamaasihyaate. Nasamaasihhi sahi aimi yapipatambihyaami winihapipa japepihiriwi maipihaiwa kiyohiwaiwa aimi namasi nehi sangi nehiihyaatimatiwihyaate. Iyataati ami sahi satiwi nyahi aimi maipihaiwa namasi noaipawaati nehiihyaanini gaahiyaaniso, tiwi maipihaiwa kaitaatiwimahe. Owetise. Autaahaatiho maaritati gwinyaasirihireti sahi japepihiriwi komi otipipatihi kawiji bimitaatiwe. ¹⁷Aiwi sahi baiwi gwinyaapi isihya nahatiyai gaahati kawiji nepi kiyai mepi autaahepumpaise. Aiwi ami isihya Kiraisihomi naisihya samataiwi koai nunyaniwi kopi giwunyaahohiyihyai sahi maariho baiwi nasisoaari nunyawise. Aiwi ami Autaahaatihopi apipaahi Awaisihoe tiwi kopi yaiwi komi otitihhi pinuwise. Aiwi ami awaisiho jiho Romihanda bindata jainjaati bimisihohi awaisihoe, tiwi yaiwi komi piwiha atiwiji komi otitihhi pinuwise.

**Kima Piwima Otipipatihiya Kiraisihomi
Kaimumwaanji Kaitaatiwihandapihaare**

¹⁸Sahi Kiraisihopi giwunyaahohiyihyaati isihya usa sangi jainjaawi bimauhi sahi kiyaami otipipatihiyaatimatiwi otipipati kawiji bimohiyihyaate sami awaisawihya sangi jainjaawi bimohiyihyaami piwiha baiwi atiwiji kiyaami otitihhi pinuwise. Sangi jainjaawi bimohiyihya napaisaati bipi kasatiwihiyaisuni ami waapihitiwi kasatiwihiyaisuni osamapi maariho nunyawu kiyaamihatihi pinuwise. ¹⁹Iyataati ami Autaahaatiho anditisaiwati neti gisunyaahonihhi sahi Autaahaatiho gwinyaasirihireti japepihirisaihi ami isihya sangi jainjaawi bimohiyihya sami kiyohitihandapi poundonihhi sangi tisapi ambipati yaasahaiwa nasamisaihaahi gaasi kandapi yamaiwise, nehi ndihaahi winjasawise kaiwi kiyai yaasahaiwa nasamito, wihoaanji maipihati windi kamaawiwo. O ami Autaahaatihohi komi otipipatapi isihya yaawihaiwa nehohiyihyaapi gaasi nisi maaritohirihireti ninjapepihiriwi kanisohitihandapi yaawihaiwa newaayowo, tati waati maaritahore.

²⁰Iyataati ami isihya sangi jainjaawi bimohiyihiyai pohipiwiwi kiyaami piwiha atihomaawiwi, ami sami gwinyaapi maaritohirihireti japepihirisaihi kandapi sangi jainjatohiyihya tisawisaihaahi sandihi sawanaatami pohipiwisotihandapi wihoanjihandi nasanyawaayopo. Sawanaati pohipiwisauhi tisawawaayowi kandapi Autaahaatiho nisi otipipatapi yaawihandi newaayopo maataise. Owetitaise. Sahi sawanaatami pohipiwisotihandapi tisawawaayowo. O ami sahi Autaahaatihomihireti japepihirisaihi kandapisatiwi tisapi ambipati yaasihaiwa nasamisaihaahi Autaahaatiho sahi yaasihaiwa nehohiwaiwaapi gaare tati sapi maarititaise.

²¹Sahi sikaiwi yaasihaiwa nepi komi otipipati kawiji bimitaatiwi gaata japihi nasamaahiyaate. Sandi katotimandi apaapimaato, ami Kiraisihoaisangi komi ambipati yaawihaiwa netaise sangi anditisaiwitando. Ko siyati kaindimandi sangi siwipati gaahati nasisataise, sahi ko yaawihaiwa nesipatamataiwi ami sangisangi naasikati kaiwi yaasihaiwa naitaatiwo.

²²“Kiraisiho maipihaiwa windi kamaayaho utaaho gaahore. Aihi ami isihyaisangi komi piwiha kima jaiwitaha katisiha kimaare tiwi ausaapi kamaatopo. Owetise. Nehihandi ambipati yaawihandi nunyawaayopo” *Aisaiyaaho 53:9*

²³Iyataati ami isihya ko Jisaasihoai sisipihundiwi kiyauhihandi kandi ami ko kiyai wihoanji sisipihundataamaase Owetise. Iyati ami kiya isihya koai nepi nusopisasiwi ambipati yaawihandi nunyohiyihiyai wihoanji itihundati ami nisangi nasopisati yaasahandi wihoanji nasamitaano undataamunje. Owetise. Autaahaatihomihandisi sawaho wihoanjihandi kiyaisi numwitaiso tati saiwa neti Autaahaatihoai nunyataise, Autaahaatiho titihi biyati isihyaami kiyohiwaiwa nahatewa tipitapaati nga kiyati mmosihoai.

²⁴Nyahi nyami maipihaiwa kiyohiwaiwaapi wihoanjihandi Autaahaatiho nanyamitotahandi Jisaasiho nyami aunahipati neti nyami maipihaiwa komi ambipati gaahateti naihi ko nyami maipihaiwa nesi ipi titihi atawihateti nimaatati komi ambipati nosasinati napotaise. Ko siyati kaindimandi ami nyahi maipihaiwa namasi kaiwaatihapi japihi nasaati titihi gaahaiwaahihii kaitihaahandapi kiyataise. Iyataati ami nyami maipihaiwaapi Kiraisihoai tiwauhi ko napotaise. Ko siyati kaindhandaahi nyami maipihaiwa namasi nasahaawi biyati gaanyimatataise. ²⁵Autaahaatiho siyati kasindimandi apaapimahe, sipisipihohi daihira namasi noti nehahaati nihirinati bimipatamataiwi jihi Jisaasihopi sangi giwunyaapihura kaanihi nihirinawi bimauhe. Saiwi nihirinawi bimauhihiyaatangi Autaahaatiho japihi nasamaasi nasati Jisaasihomihinisamataise, koai sahi niwipinjisaihi ko sami maarihoai biyati jainjatitando.

Kima Piwima Usihya Ami Asihya Aimi Namaatinihohiyihyaapihaare

3 ¹⁻²Otipipatihya kiyai winjaawi bimohiyihyaami piwiha atiwiwi kiyaami otitihii pinipatamataiwi, ami sahi asihyaati aimi

siwoyaisahiyaati sami siwoyaami piwiha napaitiwi atiwiwi kiyaami gwinyaahohirihireti japepihiriwi kiyaami otitih binuwise. Sandi apaapimaato, sami siwoya usa Autaahaatihomi piwiha windi atihomiwi Autaahaatihomihireti minjapepihiriwihiya sahi kiyaami apwaatiyaati titihi gaahaiwaahihi kaisaihi mmondaatiwo. Sahi kiyaapi nepemaitiwi nyamataiwi giwunyaitotiwi piwiha kamundiwise. Owe. Kiya nehi sahi gaahati siwoyai kawiji kiyaami piwiha atiwiwi kiyaami otitih piniyohitihandi kiya mmondaatiwo. mmonawaawi Autaahaatihomi piwiha akaahe tiwi Kiraisihopi kiya giwunyaitaatiwo. ³Aiwi ami sahi asihyaati autaahi ambipateti uti apotihiri mmoniwinjawi gaahapaahihi niyopi nipaatiwi yundanyaaminiwise. Owetane. ⁴Autahaatihomihaiwa gaahaiwa nepi sami maarihoai yundanyaawitaatiwihaiwaapi waati pihitiwi gwinyaapise. Saiwa sami maarihoai yundanyaawitaatiwiwa nosasina owetitandi yapipatambihaiwaamaahe. Owetise. Saiwa maarihomi yundanyihaiwa maariho biyati wisaita ambipati napaisaatitonih bipisi bimitaatiwihaiwaare. Saiwa sami maarihoai yundanyiha gaahapaara yundanyaawisaihi Autaahaatihomi ndiheti ngaatitaise. ⁵Iyataati ami jiji aimehura Isiraherihyaami asihya Autaahaatihopi giwunyaahohiyihiya kiyaami maarihoai yundanyiha gaahapa yundanyaawisawaayopo. Saiwi kiyaami maarihoai yundanyiha gaahapaaraahi yundanyaawisohiwaiwaraahi anditiwisih kiyaami warisaami piwiha napaitiwi atiwiwi winjapepihirawaayopo. ⁶Iyataati ami kiyaami waati Saraahaate. Saraahaati saati wariho Abiraahamihomi piwiha atiwisati komi otitih sanotaati wariho koai, “nisi awaisihone,” undahaate. Iyataati sahi aimi saiwi nunjawaayopo. Sahi aimi Autaahaatihopi giwunyaawaayopo, Saraahaati giwunyaasipatamataiwo. Saiwi sahi nehi titihi gaahaiwaahihi kiyawaawi ami sahi wapaapi windi yamaayopo. Sahi saiwi gaahaiwa kiyotihandaahi sahi Saraahaatami maatiyaatamataiwihyaati noaipawaayopo.

⁷Iyataati ami sahi usihyaati giwunyaahohiyihiyaati aimi siwaasihyaisahiyaate, ami sangisangi naasikati kaiwi titihi maariho gaaho gwinyaapi sami siwaasihyaisawi baiwi napaisaati bimaawise. Sandi apaapimaato. Sahi aimi gwinyaapihiyaate. Asihyaami ambipati samihatamatiyati watipihandisahiyaamaahe. Owetise. Isi saiwihyaaso tiwi gwinyaapi gaahati kiyai kawiji bimaawise. Iyataati ami asihyaisangi asiyihyaimatitaatiwihandi sahi nesaihi ami kiyaisangi naitaatiwihye. Isi sahi saiwi sireti kaiwi bindawaawaahi sahi Autaahaatihoi piwaundiwi nahowiwi gaapunditaatiwihira daihira wapa neti namaasisapuwitaise.

Nyahi Isihyai Nahateweti Maariho Nunyaati Gaahati Kawitihawo

⁸Wani nini piwiha watipindiha sandi sangi kasatiti owemaitandiyo. Sami maariho naasiko baiwi gwinyaapi ami isihya usa samataiwi Kiraisihopi

aimi mmoniwi giwunyaahohiyihya yaawihaiwa nehohiyihyaapi gwinyaapise. Aiwi ami kiya Kiraisihopi giwunyaahohiyihyai maariho napaitiwi nunyawise. Maariho nunyawawi asipiwiwi gaahati kawiwise. Aiwi sahi sami amitha yatih i patisaniwi gwinyaapise. ⁹Iyataati ami isihya usa sangi maipihaiwa kasatiwi sametirihiretapi setahiyaate, tiwi kasatisaihaahi ami wihoaanjha kiya kasatohiyihyai maipiha kamundiwise. Owetane. Kiya maipiha kahitohihaapi wihoaanjha nehi gaahaahihi sahi katiwi sahi Autaahaatihopi namapi gaapundiwise isihya siya sangi piwiha maipiha kasatohiyihyai gaahandi nunyati kiyai anditiwiwito. Sandi kasatohitimandi apaapimaasato, sahi aimi Autaahaatihomihyaatimatiwi bindawaawi sikaiwa kaitaatiwi ahisihihyaatitihisato. Isi saiwi kaisaihaahi ami Autaahaatiho sangi gaahati kasitaise. ¹⁰Isi sahi saiwi kaiwise. Sandi kasatohitimandi Autaahaatihomi piwiha jihaatihi Aunihihirami Utipihooatihi sata ahotise:

“Isihya usa kimaapi yapipataapihi kiyaami bimitaatiwihandi biyati nga nusoapatuni ami asisiha gaahaiwa sanionih mmoniwi bimitaatiwihandapi gwinyaawaawaahi isihya piwiha maipiha kaundohiyihyai wihoaanjha piwiha maipiha windi kamundiwise. Aiwi ami kiya piwiha jaipipa windi kamaatitaatiwe. ¹¹Jaipipa kamaatiwi ami maipihaiwa kahatamatipetahawai ahosumwapi, ami titihi gaahaiwaahihi kaiwise. Aiwi ami kiya isihya usa giwunyaahohiyihyaisawi maariho naasiko gwinyaapi bimitaatiwihandapi waati gwinyaapi ami andititiwi kaiwaahihi japepihiriwi kaiwise. ¹²Iyataati sandi apaapimaato, isihya mmoniwinjawi titihi gaahaiwaahihi kiyohiyihyai Autaahaatiho nasisoaari winjatahore. Aiwi ami kiya saiwihiya Autaahaatihoai wapaapi nunjeniwi piwaundauhaahi atiwisati keti nunyati ami anditiwihahore. Siyati Autaahaatiho komihiyai kawisataahandi kandi isihya maipihaiwa kiyohiyihyaapi itihitati wihoanjhandi kiyai pohipiwisahore,” tati ahotise. *Aunihihiri 34:12-16*

Sahi Ambipati Yaasihaiwa Nepi Nosasindaatiwihandapi Yamaiwise

¹³Sahi mmoniwinjawi titihi gaahaiwaahihi maaritiwi andititiwi kaimi naisaihi ndi sangi maipihaiwa kasisati neti nasopisaisitaise? Utaaho wo siyati kasitandih owe. ¹⁴Iyataahandi kandi ami sahi andititiwi titihi gaahaiwaahihi mmoniwinjawi japepihiriwi kaimi naisaihi ami isihya usa sami kiyohiwiwaapisatiwi nepi nasopisaisaihaahi sahi maaritiwise. Sandi sahi Autaahaatihomi gwinyaasirihireti japepihirawaawi yaasihandi newaayowi ami Autaahaatiho gaahati kasisati jatatamanitaise.

“Iyataati ami isihya sangi yasimapihaiwa wiwa kasisaihi ami sahi windi kiyaapi yamaiwise. Aiwi ami kaiwapaapi sami maariho jandoti maariho owemaasetane. Owetane”. *Aisaiyaaho 8:12-13*

¹⁵Sahi sami maarihoatihapi saiwi gwinyaapise, Kiraisiho nyami awaisiho naasohisi nyangi ko biyati nyainjaati bimitaise, tiwi gwinyaapise. Iyataati ami sahi Autaahaatiho sangi nasamitandi katiwaiwaapi jatimi nyohitihandami tanyaahaapi isihiya nasisesaihaahi, ami sahi wihoaaŋiha nusesipapiha piwiha kaunditaatiwiha nahateweti nepi detemapi timetiwise. ¹⁶Isihiya saiwi nasisesaihi wihoaaŋiha sahi kaundawaahura bipi napaisiha piwiha kaundiwise. Aiwi ami sahi titihi gaahaiwaahihi mmoniwinjawwi kaiwise Autaahaatiho gwinyaati maariwaiwo. Sandi apaapimaato, sahi saiwi gaahaiwaahihi kaimi naisaihi isihiya sami gaahaiwa kaimi nyohiwaiwaapisatiwi piwiha maipihaiwa kasatohiyihiyai mawitando. Iyonihi ami isihiya usa sami gaahaiwa kaiwi Kiraisihomihireti japepihiriwi kiyohiwaiwaapi mmoniwi giwunyaatahiya isihiya usa piwiha maipiha kasatohiyihiyaapi kimiya titihi gaahaiwa kiyauhihandi kimiya isimiya nehihaiwa taawi piwiha maipihaiwa kaundawaayopo, tiwi mmondaatiwo. ¹⁷Ami sikaiwi kaiwise. Sandi apaapimaato, nyahi Autaahaatihomihireti japepihiraati gaahaiwa mmonainjaati kaimi naisaihi kaiwaapinyatiwi isihiya ambipati yaasihaiwa nanyamitaatiwihandapi Autaahaatiho maarita gwinyaasirihiretinaahi gaare. O ami nyahi maipihaiwa kaisaihi ami isihiya kaiwaapinyatiwi ambipati yaasihaiwa nanyinyawi nyawisaihaahi ami sandihi maipe. Iyataati ami Autaahaatihoaisangi nyapi windi maarimititaise. Owetitaise.

Kiraisiho Aimi Napomatati Japihi Nepataati Nyangi Japihi Nanyamaataise

¹⁸Iyataati ami Kiraisiho kaindihandapi gwinyaapise. Kiraisihoaisangi Autaahaatihomihireti japepihirati gaahaiwaahihi kaindihandapi yaawihandi netaise. Iyataati Kiraisiho so utaaho gaaho apipaahi ainaiho nyapimainjihi nyahi maipihaiwaisahiyaanami aunahipati neti ko napotaise. Ko nyami maipihaiwa kiyohiwaiwa nenyamaitandi nehi naasaraahihi napotaise. Jihaati nyami maipihaiwaapi ko windi namaapwitaise. Iyati ami ko nyahi Autaahaatihoaisaati manditipinaati nyahi yandihitihini ami ko yandihitihini siyaati yiyandihini bimonihini neti ahonyisati deti Autaahaatihomihini ahinyisataise, Autaahaatihoaisaati maasi piwanaati bimitihaawo. Kiraisiho nyamatiyahati ambipatisahoai kimaapi yapipataapihi tiwauhi ko napotaise. Napwihihandi kandi Autaahaatihomi Itipihohi Gaaho ahowimati japihi numwaasihi japihi nepati ambipati watipihati wipetahati Itipihomihati neti asoheomatati yamihapataatihi yamo bindataise. ¹⁹Siyati ko ambipati wipetahati watipihati Itipihomihati neti isihiya aimi napohiyihiyaami maariho napwitiwi bimohiyihiyaapihi noti noaipati kiyai saundataise. “Nisi tiworisaisuni ami nahataapaisuni aimi ninihimandi titi ipihatisataayo,”

undati kiyai kaundataase. ²⁰Isihiya napohiyihiyaami maariho napwitiwi napwitohipihi bimohiyihiya siya apaapimaahae. Jihura Nuwaaho bimisura ko Nuwaaho Autaahaatihomi piwiha ausaati kaundihandi kandi kiya windi atihomiwi pohipaiwi nemahohiyihiyaare. Iyataati isihiya maipihaiwa pihitiwi kiyawaayopo. Saiwi kiya Autaahaatihomi piwihaapi pohipaiwi nemahauhihandi kandi ko Autaahaatiho wihoaanjhandi yaawihandi keti namumwise. Owetise. Kiya kiyaami maipihaiwa namasi japihi nepemaitowo tati namati jatataise. Jatihi Nuwaaho ami sura sipihandi awaindihandi taati kiyametaati Autaahaatihomi piwiha ausaataise. Siyati piwiha ausaati kaundihandi kandi kiya windi atihomisauhi nehi naasiyaahi isihiya ikwiri naasairitihahi wihinirami murimotahiyaaahi Autaahaatihomi piwiha atiwi nepi sipihandoti nandaawaayopo. Sipihandoti nandaahohiyihiya waapoho naniwi windi namaapopo. Owetise. kiya nga baiwi bindawaayopo. Isihiya Autaahaatihomi piwiha nemapi pohipiyohiyihiyaahihahi napopo. ²¹Saati waapihaati Autaahaatiho wani nyangi kanyindihandapi siwipati namihanahaate. Isihiya waapohora baasusauhi Autaahaatiho sangi japihi nasamaataise. Iyataati ami isihiya waapoho nehauhi waapoho koraahi ambipatami kipati basati nemwataamaise. Owetise. Kiya waapoho nehotimandi nyahi aimi nepemaitaati Kiraisihoai nunyanaati komihireti japepihiraati titihahi gaahaiwaahihahi kaitihaawiyo, undiwi isihiyai nunjitaatiwi waapoho nehopo. Jisasi Kiraisiho napwihi Itipihohi japihi ahowimati numwaasihomihetapi nyangi Autaahaatiho japihi nanyamaataise. ²²Jisasi Kiraisiho yamihapataatihi aimi niyati noaipasihahi Autaahaatiho Koai neti nuwimaati ambipati awaipati nunyati komi ikwiri gaatihiraihoaanji newisataise. Newihi ko Autaahaatihomi otipipatihaiya awaisawihiyaisuni ami wapa apipaahi watipihapaisuni Awaisihoematati winjaati bimihahi kapa nahataapa ko Kiraisihomi otitihahi ahondaise.

Kiraisihopi Giwunyaahohiyihiya Nehi Kiyai Wireti Bimitaatiwe

4 ¹Kiraisiho Komi ambipati yaawihandi netaise. Isi ami sangisangi naasikati kaiwi Kiraisihomi gwinyaati kaimumwaanji kamwaanji kaiwise. Sandi apaapimaahae. Sahi ambipati yaasihaiwa newaawaahi sahi maipihaiwa namaposawi gaahaiwaahihahi kiyawaawe. ²Kimaapi yapipataapihi bindawaahura Autaahaatihomi gwinyaasirihireti kiyaatinihi japepihiritaatiwe. Aiwi isihiya mambihaiya kahapaamapipa gwinyaahohirihireti windi minjapepihiritaatiwe. Ami sandi apaapimaato, utaaho wo komi ambipateti yaawihaiwa nesihohi aimi maipihaiwa namataise. ³O ami jihuraahi sahi apipaahi maipihaiwa Autaahaatihopi gimaawunyaapihiya maariwi kiyohiwaiwaamatayahaiwa aimi nga kaiwi bisotimbihiyahate. Iyataati maipiwa sahi kaiwi bimohiwaiwa saiwa siyahaiwaapito. Usihiya ami asihaiya kihiyaisawi kiyaami ambipati

gohapari timaamaitiwi, ami maipihaiwa pihitiwi gwinyaapi kaiwi ami nandapa maaritiwi nipinjawi pihitiwi naniwi, ami waapoho naniwi naharitaatiwiho pihitiwi naniwi nahiriwi ami Autaahaatiho akohomi winihapipa nemapi, ami autaahaatiho jaiwitahopi sahi gwinyaapi gaapundimbiihiyaate. ⁴ Ami Sahi wani saiwa isihiya Autaahaatihopi nanipimatiwi windi mmoniwi gimaawunyaahohiyihiyaisawi windi kamaayopo. Aihi kiya sangi jasonawaawi kimiya isimiya nyamataiwi nyami kiyohirihireti kamaiwi kiyai nehi wireti kiyowo, tiwi jasonawaawi yaiwimawaayopo. Yaiwimaposawi sahi asireti kiyopo, satiwi itihisatawaatopo. ⁵ Isi siya isiya ipotihura Awaisiho isihiyaami kiyohiwaiwa neti tipitapaati mmondandihomi ndiheti noaipapi bitotawaawi sandapi siyaati kiyahaayo, undiwi kaunditaatiwe. Sati kiyati isihiya napohiyihiyaisuni ami isihiya asiyihiyaisuni kiya kiyohiwaiwa neti tipitapaati usondandihomi aimi timendaise. ⁶ Sandi kandapi aimi isihiya napohiyihiya asiyihiya sangi napopi bimauihi piwiha gaaha ausaahauhi aimi atisopo. Isihiya maipihaiwa kiyohiyihiya napohipatamataiwi napowaayopo. Napowaahandi kandi wani asiyihiyaimatitaatiwihandi nepi ambipati watipihati wipetahati nepi itipihiyaimatiwi Autaahaatiho Itipihomi bimipatamataiwi bindawaayopo.

**Autaahaatiho Otipipati Nyahi Wapa Gaahapa Kamaayaahandi
Nehihandi Nanyamipati Kati Napaitaati Kaitihaawo**

⁷ Kahapaamapipa nahataapa noti owetitandihura aimi nasati detindaise. Isi sahi sami amitiha nga titihi gwinyaapi sahi sawanaati baiwi jatiniwi jaawi bitosawise. Saiwi titihi jaawi bitotawaawi baiwi gaapunditaatiwo. ⁸ Aiwi ami sahi nahateweti Autaahaatihomi isihiya usai napaitiwi maariho nunyawise. Sandi ami apaapimaato, isihiya usai maariho napaitipi numwingitihandi sandi maipihaiwa gimunyaatati kahatamatipetahaiwa nahatewai neti noasati namaasati, ami gaahaiwa wiwa isihiya kiyohiwaiwa nahatewai apipaahi nusatipihahande. ⁹ Ami Autaahaatihomi isihiya usa sangisenda napisaihihiyai sahi baiwi numwaapi kiyai iwitatamaniwise. Sahi sami omanititihii maarihoaatihapi kiyaapi mimaipaiwi gwinyaapi satiwi, nyahi kiyai iwitatamanitihawo ponyatise tiwi gimunyaapise. Sahi kiya Autaahaatihomi isihiya Kiraisihomi naisihiyai sami anjipihii numwaapi nandapa nunyaw anditiwipise. ¹⁰ Autaahaatiho nehi koai sawaho gwinyaati maaritirihireti nyangi gaahati kanyisati komi otipipati gaahati nyahi nehi ninaasiyaanangi yiyandihii kihati kihati nyahi gaahandi windi kamaayaahandi nehihandi nyangi nanyinyataise, komi isihiya usai anditiwiwaati kaitihaahawo. Isi kaiwa otipiwa Autaahaatiho nyangi nehihandi nanyamiwiwa biyaati jataati, ami napaitaati kaitihaawo komi isihiyai gaahati kawisaati biyaati newaati kiyai iwitatamanitihawo.

¹¹Iyataati ami utaaho wo Autaahaatihomi piwiha ausaitandihati otipipati netaataahi ami ko kati napaitati biyati kiyati Autaahaatihomi piwiha ausaati isihiyai kaundane. O ami utaaho wo isihiyai iwitatamanati gaahati kawisati anditiwiwitandihati netaataahi ami ko kati biyati napaitati Autaahaatiho watipihandi koai numwindihandaahi kiyane isihiyai iwitatamanitanda. Ami sahi saiwa gaahaiwa saiwi kaisaihi isihiya kaiwa sahi gaahaiwa kiyohiwaiwa mmonawaawi sahi ninaasonji Kiraisihomihiyaatitanihi namapi kiya Autaahaatihoai mepi autaahepumaito. Iyataati so Autaahaatiho nausainjitihanduni ami watipihaiwa nahatewauni nasisoaari komiheti ahotimi nohore. Isi ko setahosi Akite.

**Nyahi Kiraisiho Koai Yaawihaiwa Nesipatamatiyaati
Maaritaati Yaasihaiwa Naitihaawo**

¹²Nisi naisihyaati nini sangi nisi maariho nasanyohiyihyaati nisataiwi Kiraisihopi giwunyaahohiyihyaate. Sangi nasisenahandi sami ambipati yaasihandi ami sisihaamatiyati tisatihandi sahi taawi nehohitindapi sahi yaiwi pihitiwi gimunyaapise. Sandi sami ambipati yaasihandi sahi taawi nehotindi isihiya usa namepi nehi wanihandi kandi wipetahandi nehi sahihi taawi newaamaayopo. Owetise. ¹³Sahi sandi sami ambipati yaasihandi taawi nehotimandi ami sandihi Kiraisiho komi ambipati yaawihandi nesipatamataiwi sangi nasoaipasihahi sahi taawi newaayopo. Isi ami sahi sandapi waati maaritiwise. Ami Kiraisiho Komi nausainjitihandisati auta noaipahonihura sahi apipaahi aungwohandi maarititaatiwo. ¹⁴Sahi isihiyai nyahi Kiraisihomihiyaane undiwi Kiraisihomihireti japepihirisaihi kandapi isihiya sangi sisipisatiwi itihisasaihaahi sandihi ami gaasi maaritiwise. Ami sandihi Autaahaatihomi Itipiho Gaaho nausainjitihandi apipaahi watipihandisaho samiheti aimi bimohiyaatitihiso. ¹⁵Sahi baiwi jaawo. Ami sahi wiwa yaasihaiwa newaawaahi kaiwa sahi nehohiwiwa siyahiretapimetitanda. Sahi isihiya siyihiyai timapihiyaatitati ami isihiya usaamihapa nusepi ikowiniwihyaatitati, ami maipihaiwa wiwa kaiwihyaatitati ami otipipati usaamihapa wiwa nepi iwiriwiwi nusopisasawihyaatitanihi kaiwaapi ambipati yaasihaiwa nasanyawaawaitaawo? ¹⁶O ami sahi noaipapi Kiraisihomihiyaatimatisaihi kandapi ambipati yaasihaiwa isihiya nasamisaihi newaawaahi ami sandapi sangi windi mamaasane. Owetane. Mamaasati namapi sahi satiwi, nyahi Kiraisihopi giwunyaahotihandapi yaasihandi isihiya nyangi nanyinyauhi nehaayono, tiwi maaritiwi Autaahaatihoai gaahonje gaare undiwi komi ambipati mepi autaahepumapise.

¹⁷Autahaatiho nyahi komi isihyaanangi jihi namasati neti tipitapaati nyahi komihaiwa kiyohiwaiwa nyasondaise. Ami nyahi komihyaanangi

jih siyati nyami otipipati tipitapaati nyasonataisi ami isihya
 Autaahaatihomi piwiha gaaha waniha windi atihomisoheyihyaahi
 windi yamaanihimaitaapo. Ami kiyaisaahi akitinihi waati wireti
 Autaahaatiho tipitapaati usonati nemaitaise. ¹⁸Iyataati ami
 Autaahaatihomi piwiha jihatih wapihi satati jipatipindise: “Isihya
 titih gaahiyaisi Autaahaatiho ipotataatihandi apipaahiyai japihi nga
 windi namumwaitaahetahandi kandi numwaahonaahi ami isihya
 Autaahaatihoai ahosumwapi pohipiwisohiyihiyai napitiwimatitaindiho,”
 tati jipatipindise. ¹⁹Isi ami isihya Kiraisihopi giwunyaahohiyihya
 usa Autaahaatiho maaritati gwinyaasirihireti kiyaami ambipati, ami
 maariho yaawihandi newaawaahi gaasi kiyai kiyati ahawisih napaitati
 iwinjatisihomi ikwiraatihematiwi bindawaawi yaawihandi kaiwi nepi
 ami nehi gaahaiwaahih nasisoari kiya kaimi nuwuse.

Sahi Mitihyaati Autaahaatihomi Isihyai Baiwi Winjatiwise

5 ¹Sahi mitihyaati Autaahaatihomi isihyai winjatohiyihyaatangi
 piwiha kima kasatitandiyo. Iyataati ami nisangi samataindi
 mitihonine. Iyataati Kiraisiho komi ambipateti yaawihandi nesih nini
 nisi ndihaaraahi usonitihonine. Iyataati ami sahuni ami ninuni Awaisiho
 Kiraisiho komi nausainjitihandi watipihandisati auta noaipahonihura,
 Autaahaatiho gaahapa wapa nanyamitandi katimbipa nanyinyonih maasi
 nahatiyaanini naitihaahiyaaninitih sangi saiwi kaiwise, satiti watipindi
 sandi kasatataato. ²Autaahaatihomi isihya siya sipisipihomataiwihyaasi
 kiyai sahi baiwi winjatiwise, Autaahaatiho neti sami ikwiraatihemataiso.
 Sahi maaritiwi Autaahaatihomi isihyai winjatiwise saiwi isihyai
 winjatitaatiwi Autaahaatiho maaritirihireti japepihiriwo. Aiwi ami
 usaami kiyohipati mmonawaawi nawih newaati otipipati kaitaano
 tiwi gwinyaapi kamaiwise. Owetane. Otipipatapi maaritiwi nehi
 kaiwise. ³Autaahaatiho komi isihya siyai neti sahi kiyai winjatitaatiwi
 sami ikwiraatihemataise. Isi sahi satiwi, nyahi awaisawihyaaniso,
 tiwi naimaataawaawi ami kiyai waapihundiwi, kimandi kaiwise ami
 yahandi kaiwise, undiwi kiyaami gwinyaahohitihandi nepi daahi
 uripatiwi kamaiwise. Owetane. Isihyai saiwi saiwi kaiwise undiwi
 nunjawihaiwaahih kaiwise. Sahi saiwi kaisaihi ami kiya kireti japi nepi
 kireti japepihiriwi kaitaatiwo. ⁴Sahi saiwi sireti kiyawaawaahi sipisipih
 Jatisiho Awaisiho Jiho auta nasataahura sangi nasamitandi timanati
 isiwatimbipa nasanyonih nga naitaapo. Iyataati sapa windi owemetati
 nasisoari kapaanih ahotimi nutandihapaare.

Nyahi Yawanaani Autaahaatihomi Ikwiraatihimatitihawo

⁵Iyataati ami sahi wainyihyaatisangi naasikati kaiwi ami isihya
 gwinyaahiya mitihyaami piwiha baiwi napaitiwi atiwiwi kiyaamihatih

binuwise. Aiwi ami sahi sawanaati windi namimaatiwise. Bipi yatih i patisaniwi isihya Kiraisihomihya kopi giwunyaahohiyihyaamihatih binuwise. Iyataati ami nyahih aimi gwinyaawaahiyaane. Ami Autaahaatihomi piwihaatihi wapihi satati jipatipindise:

“Autaahaatiho isihya sawana naimaatohiyihiyai neti daahi ipihatisataati ami isihya sawana ipihatisanohiyihiyai gaahati kawisati neti iwitatamanahore,”

tati jipatipindise. ⁶Isi sahi sawanaatami maaritiwi kiyohiwaiwa namihaapi bipi yatih i patisaniwi Autaahaatihomi ikwiri watipihirami otitih bimaawise. Saiwi bimisaihi sangi neti nasimaitandiha asisih namihainjiha noaipahonihura ka asiseti sawaho sangi neti autaesamaitando. ⁷Autaahaatiho sapi gisunyaati biyati jainjatataisi sahi naanjwaiwa nehohiwaiwa nahatewa Autaahaatiho sawahomi ikwiraatihimapise.

⁸Sahi sawanaati baiwi jaawo. Aiwi ami timetiwise Bwaasirihiri yaihiri nahateweti suhiri ainjihirihiramatiyati noti nasayati taati gaatati daati daayataiso, isihiyai neti ikoti iwirisati nusopisasitando. ⁹Iyataati ami sahi sami Kiraisihopi giwunyaahohitihandi andititiwi watipitiwi isipi bitotawaawi kiri nepi tipindiwi ipihatiwimapise. Iyataati ami sangisangi aimi mmoniwi nasesipatati gwinyaapihiyaate, Autaahaatihomi isihya wapihi nahandaahiyaisangi naasikati kaiwi samatawi naanjihaiwa taawi newaayopo. ¹⁰Isihiyai gaahaiwa wiwa kiya kamaiwi nehihandi gaahandi kawisati nunyati iwitatamasiwaiwaami Autaahaatiho sawaho tanyaahore. Iyati ko Kiraisihomihetapi sangi gaatati nasamaataise, sahi Kiraisihoaisawi maasi nausainjitihandi kandinih nasisoaari ahotindihandaatihi bimitaatiwo. Isi masihonjeti ambipati yaasati naanjihaiwa naitaapo. Iyonih ko sami naajati yaasiwaiwa nesamahonih noaipapi sami ambipati amitiha maarihoatihi apipaahi gaahiyaatimatitaapo. Iyati ami ko sami giwunyaahohitihandi neti watipisamati anditisaihonihi sahi andititiwi kopi giwunyaapi bitoaitaapo. ¹¹Ko sawaho naasohi nahatewa watipihaiwaisaho nasisoaari bimohore. Siyahosi Akite.

Pitaaho Ipotiha Gaahuraare Daase

¹²Sairaasiho ningi anditinihihi maisahuraaji utipi masimonji kimonji jipatipiyaha sapi nini nusoasataayo. Iyataati so Sairaasimo nyamatiyati Kiraisihopi giwunyaahosi nyami naisoho akohore. Nini utipimo kimo nusoasohimo Autaahaatiho maariho nyangi nanyamindahanda komi gaahati nyangi kanyisati kanyiwaiwa neti nanyisami naiwaiwaapi saiwa titih akitihaiwa nanyisataise, satiti neti japihi gisunyaati jipatipiyataayo, sahi andititiwi giwunyaapi bitoaitaatiwo.

¹³Autaahaatiho sangi nisihiyaate, satati nasamahanataati ami isihya kimbih Babironihanda bimohiyihyaapi ami siya nisihiyaare tati

namiainjawihya sangi asisiha gaahure satawaatopo.^a Aihi ami nisi maasihio akohomatiyati ningi otipipatapi anditinihiho Maakihoaisangi asisiha gaahure, satataase. ¹⁴Sahi Kiraisihomihyaati maariho biyaati akitinihi naminihaayo, tiwi nasoandaatiwi geriniwi bimaawise.

Sahi Kiraisihoaisawi timaamaitiwihyaatisi sami maariho biyati wisaitati napaisaatitane, ndi nini Pitaahonini utipihio kimo jipatipiyataayo.

^a 5:13 Pitaaho aunahipati awaipati Romihandapi siwipati namihanati, “Babironihanda” bimohiyihiyo, tati kandaase.